

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya
No. Telefon : 03-8882 5562
No. Fax : 03-8882 5569

KPDNHEP BERJAYA MENUMPASKAN AKTIVITI PENYELEWENGAN MINYAK DIESEL BERSUBSIDI

PUTRAJAYA, 25 Mac 2022 – Kementerian Perdagangan Dalam Negeri dan Hal Ehwal Pengguna (KPDNHEP) berjaya menumpaskan aktiviti penyelewengan minyak diesel bersubsidi dalam tiga (3) siri serbuan yang dilakukan ke atas sebuah stesen minyak di Puchong, Selangor yang disyaki melakukan aktiviti penyelewengan minyak diesel bersubsidi pada 22 Mac 2022.

2. Serbuan yang bermula pada jam 10.00 malam itu dengan kekuatan keseluruhan seramai sembilan (9) pegawai dan anggota penguat kuasa daripada KPDNHEP Putrajaya adalah hasil risikan yang telah dilakukan oleh pihak KPDNHEP sejak beberapa hari yang lalu. Ketika serbuan yang dilakukan ke atas stesen minyak berkenaan, terdapat dua (2) buah lori sedang mengisi minyak diesel bersubsidi di dua (2) buah pam berasingan di stesen minyak berkenaan.

3. Hasil pemeriksaan ke atas sebuah lori bermuatan 24 tan mendapati, pemandu lori warganegara tempatan terbabit gagal mengemukakan sebarang dokumen di bawah Akta Kawalan Bekalan 1961 bagi berurusan secara borong atau runcit barang kawalan berjadual iaitu minyak diesel. Hasil pemeriksaan lanjut mendapati, terdapat enam (6) buah tong drum di ruangan muatan lori terbabit yang mengandungi diesel.

4. Hasil pemeriksaan ke atas sebuah lagi lori berkapasiti lima (5) tan mendapati, pemandu lori dan seorang kelindan kedua-duanya bukan warganegara gagal mengemukakan sebarang dokumen di bawah Akta Kawalan Bekalan 1961 bagi berurusan secara borong atau runcit barang kawalan berjadual iaitu minyak diesel. Hasil pemeriksaan lanjut mendapati, terdapat enam (6) buah tong drum di ruangan muatan lori terbabit yang mengandungi diesel.

5. Pasukan serbuan juga telah mengambil tindakan ke atas pengusaha stesen minyak terbabit kerana disyaki melakukan kesalahan di bawah Subperaturan 21(1) Peraturan-Peraturan Kawalan Bekalan 1974, Pelanggaran Subperaturan 12A Peraturan-Peraturan Kawalan Bekalan 1974 iaitu selaku Peruncit barang kawalan tidak mematuhi arahan Pengawal.

6. Hasil serbuan yang telah dijalankan ke atas tiga (3) kes berkenaan, pasukan serbuan telah mengambil tindakan dengan menyita keseluruhan sejumlah 2,220 liter minyak diesel, dua (2) buah lori, satu set dekoder CCTV dan invois/resit jualan dan belian berserta dokumen-dokumen perniagaan yang lain bagi tujuan siasatan lanjut. Nilai keseluruhan rampasan dianggarkan berjumlah RM 169, 644.00.

7. Empat (4) individu lelaki dua (2) daripadanya adalah warga tempatan masing-masing dalam lingkungan umur 30 dan 50 an yang mengaku sebagai pemandu lori dan pengurus syarikat stesen minyak berkenaan serta dua (2) lagi bukan warganegara juga berumur

lingkungan 30 an yang mengaku sebagai pemandu lori dan pekerja turut ditahan bagi membantu siasatan.

8. Kertas siasatan telah dibuka dan siasatan lanjut terhadap kes ini akan dilakukan di bawah Akta Kawalan Bekalan 1961 bagi mengenalpasti rangkaian pengedaran minyak diesel tersebut bermula daripada stesen minyak berkenaan sehinggalah ke lokasi minyak diesel tersebut diedarkan.

9. Jika sabit kesalahan boleh didenda tidak lebih RM 1,000,000.00 (Ringgit Malaysia Satu Juta) bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat sekiranya sabit kesalahan boleh didenda tidak melebihi RM 3,000,000.00 (Ringgit Malaysia Tiga Juta).

10. Kementerian juga akan mengambil tindakan tegas dengan menggantung sementara lesen berkaitan barang kawalan di bawah Akta Kawalan Bekalan 1961 (CSA) dan kebenaran di bawah Akta Kemajuan Petroleum 1974 (PDA) oleh syarikat yang terlibat sehingga siasatan selesai dijalankan dan keputusan kes dimuktamadkan.

11. Selain itu, syarikat ini juga akan disiasat di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) (Akta 613) iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil

pendapatan atau harta yang dijana daripada aktiviti haram penyelewengan barang kawalan bersubsidi terutamanya berkaitan minyak diesel.

12. Jika disabitkan dengan kesalahan di bawah Akta 613 ini boleh dipenjarakan selama tempoh tidak melebihi lima belas (15) tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

13. KPDNHEP ingin memberi amaran keras kepada semua pengusaha stesen minyak dan peniaga yang berurusan dengan barang kawalan dan bersubsidi terutamanya minyak diesel ini dan menegaskan bahawa Kementerian tidak akan berkompromi dengan mana-mana pihak yang didapati terlibat dalam penyelewengan dan aktiviti haram ini.

14. Masyarakat disaran untuk menjadi mata dan telinga kepada pihak berkuasa dengan memberikan kerjasama sekiranya mempunyai sebarang maklumat berhubung aktiviti penyelewengan barang kawalan dan bersubsidi ini bagi memastikan aktiviti haram ini dapat dibanteras sehingga ke akar umbi.

15. Orang ramai yang mempunyai sebarang maklumat berhubung penyelewengan barang kawalan dan bersubsidi ini boleh menyalurkan aduan yang lengkap kepada pihak Kementerian melalui saluran berikut:

- i. WhatsApp 019-279 4317
- ii. Portal Aduan; e-aduan.kpdnhep.gov.my
- iii. Call Centre 1-800-886-800
- iv. Emel e-aduan@kpdnhep.gov.my
- v. Ez ADU KPDNHEP

Azman bin Adam
Pengarah Penguat Kuasa
Kementerian Perdagangan Dalam Negeri
dan Hal Ehwal Pengguna,
PUTRAJAYA

25 Mac 2022

LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran. Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampunkan sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkapi dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan niaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

